

四庫全書

史部

欽定四庫全書

史部

遼史拾遺卷八

九

詳校官庶吉士臣瑚圖禮

總校官庶吉士臣何思鈞

校對官助教臣胡子襄

謄錄監生臣趙興文

欽定四庫全書

遼史拾遺卷八

錢塘厲鶚撰

本紀第十五

聖宗六

二十八年夏五月丙午高麗西京留守康兆弑其主誦  
擅立誦從兄訥詔諸道繕甲兵以備東征

高麗史曰獻哀主太后皇甫氏戴宗之女生穆宗穆

宗即位冊上尊號曰應天啟聖靜德王太后穆宗年  
已十八太后攝政居千秋殿號千秋太后與金致陽  
通而生子欲以其子嗣王位時顯宗為大良院君太  
后忌之強令出家寓居三角山神穴寺時稱神穴小  
君太后屢遣人謀害一日使內人遺以酒餅皆和毒  
藥內人到寺求見小君欲親勸食寺有僧輒匿小君  
於地穴中給之曰小君出遊山中安知去處耶及內人  
還散之庭中鳥雀食而即斃凡忠臣義士尤所忌憚

多以非罪陷之穆宗不能禁十二年正月千秋殿灾  
太后入長生殿後康兆殺致陽父子流太后親屬于  
海島又使人弑穆宗於是太后歸居黃州者二十一  
年顯宗二十年薨于崇德宮壽六十六葬幽陵東  
國通鑑曰穆宗母千秋太后皇甫氏逼大良院君詢  
為僧初洞州人金致陽太后外族性姦巧嘗詐祝髮  
出入千秋宮頗有醜聲成宗杖配遠地成宗薨召授  
闕門通事舍人不數年貴寵無比百官予奪皆出其

手親黨布列勢傾中外起第至三百餘間臺榭園池窮極美麗日夜與太后遊戲無所畏忌洞州立祠額曰星宿寺又于宮城西北隅立十王寺其圖像奇怪難狀潛懷異志以求陰助凡器皿皆銘其鐘銘曰當生東國之時同修善種後往西方之日共証菩提王嘗欲黜之恐傷母志不敢也至是太后生子是私致陽所生也與致陽謀為王後忌大良院君強令出家年十二初寓崇教寺有僧夢見大星隕于寺庭變為龍

又變為人即大良院君也由是衆多奇之後寓居三角  
山神穴寺太后潛遣人謀害者屢矣寺有老僧穴地  
室中匿之而上置卧榻以防不測十二年春正月庚  
午王不豫召給事中蔡忠順入卧內辟左右語曰朕  
朝夕入地太祖之孫惟大良院君在卿與崔沆素懷  
忠義宜盡心匡扶使社稷不屬異姓忠順等議遣宣  
徽判官皇甫義郎將文演等往迎于神穴寺西北  
面巡檢使康兆舉兵來遂謀廢立先是王知金致陽

謀變召太良院君又知殿中監李周禎附致陽權授西北面都巡檢副使即日發遣仍徵兆入衛兆聞命行至洞州龍泉驛內史主書魏從掌書記崔昌魯坐事被黜深怨朝廷常欲構難二人俱謁兆紹曰主上疾篤命在頃刻太后與致陽謀奪社稷以公在外手握重兵恐或不從矯命徵召足下速還本道舉義兵保國全身時不可失兆然之以為王已薨朝廷悉被致陽誑誤便回本營太后忌兆來遣內臣守岳嶺使



過行人兆父患之為書納竹杖中令奴剃髮為偽詭言  
妙香山僧報兆云王已賓天姦兒用事可舉兵來以  
靖國難奴晝夜急走至兆所氣竭而斃兆探杖得書  
愈信王薨遂與副使吏部侍郎李鉉雲等領甲卒五  
千至平州始知王未薨喪氣垂頭良久諸將曰業已來  
矣不可止也于是兆決意廢立不知王已迎大良院君  
乃遣分司監察御史金應仁率兵往迎之二月己丑  
大良院君詢即位康兆廢王為讓國公遣兵誅致陽

父子流其黨及太后親屬三十餘人于海島康兆弑  
前王于積城縣踰月火葬縣南陵曰恭陵謚宣靈廟  
號愍宗臣民莫不痛憤而新王未知也至契丹興師  
問罪乃知被弑改謚宣讓廟號穆宗

夏六月

契丹國志曰統和二十八年夏六月契丹遣使往宋  
告糴宋詔雄州出粟二萬石賤價賑之

秋七月

東國通鑑曰顯宗元文王元年秋七月契丹遣給事中梁炳大將軍耶律允來問前王之故

冬十月丙午朔王詢遣使奉表乞罷師不許

高麗史曰顯宗元年秋八月丁未朔遣內史侍郎平章事陳頔直中臺尚書右丞尹餘如契丹九月遣左司員外郎金延保如契丹秋季問候左司郎中佐暹將作丞白日昇如契丹東京修好冬十月癸丑契丹遣給事中高正闔門引進使韓杞來告興師參知政

事李禮均右僕射王同穎如契丹請和十一月丙子朔遣起居郎薑周載如契丹賀冬至契丹遣將軍蕭凝來告親征

十一月乙酉大軍渡鴨綠江康兆拒戰敗之退保銅州丙戌兆復出右皮室詳袞耶律圖魯擒兆及副將李立追殺數十里獲所棄糧餉鎧仗

東國通鑑曰十一月辛卯契丹主自將步騎四十萬號義軍天兵渡鴨綠江圍興化鎮巡檢使楊規鎮使

鄭成副使李守和嬰城固守壬辰康兆等分軍出龜  
州北惡頗湯井曙星三道與契丹戰敗績契丹主獲  
通州城外收禾男女各賜錦衣授紙封一箭以兵三  
百餘人送興化鎮諭其將箭封書曰朕以前王誦服  
事朝廷其來久矣今逆臣康兆弑君立幼故親率精兵  
已臨國境汝等擒康兆送駕前即便回兵不然直入  
開京殺汝妻孥癸巳又勅曰朕以前王誦紹其祖服  
為我藩臣捍禦封陞忽被姦凶所害朕將精銳來討

罪人其餘脇從皆與原免況汝等受前王撫綏之惠  
知歷代順逆之由當體朕懷無貽後悔是日李守和  
等上表陳謝甲午契丹主以錦衣銀器等物賜鎮將  
有差仍勅曰省所上表奏具悉朕纂承五聖臨御萬  
邦忠良則必示旌褒凶逆則須行誅伐以康兆弑其  
故主挾彼幼君轉恣姦豪大示威福故親行誅伐以  
臨近境比頒綸旨式示招懷遽覽封章未聞歸款汝  
等必知逆順豈可助謀于逆黨不思雪憤于前王宜

顧安危預分禍福乙未守和又回奏云臣等昨奉詔  
泥輒陳心石望賜泣辜之惠切祈解網之仁契丹主  
見表知其不降丁酉解圍以二十萬兵屯于麟州納  
喇丹更以二十萬兵進至通州移軍銅山下康兆引  
兵出通州城南分軍為三隔水而陣一營于州西據  
三水之會兆居其中一營于近州之山一附城而營  
兆以劔車排陣契丹兵至合攻之無不摧靡契丹兵  
屢退兆遂有輕敵之心與人彈棋契丹先鋒耶律文

努率詳袞耶律圖魯擊破三水砦鎮主告契丹兵至  
兆不信曰如口中之食少則不可宜使多入再告急  
曰契丹兵已多入兆驚起曰信乎恍惚若見穆宗立  
於其後叱之曰汝奴休矣天伐詎可逃耶兆即脫鍔  
長跪曰死罪死罪言未訖契丹兵已縛兆裹以氊載  
之以去李鉉雲盧戡盧顗楊景李成佐等皆被執盧  
顗徐崧盧楨皆死我軍大亂契丹兵乘勝追奔數十  
里斬首三萬餘級所棄糧餉鎧仗不可勝計于是契



丹兵斬兆長驅而進左右奇軍將軍金訓金繼夫李  
元申寧漢伏兵于緩項嶺皆執短兵突出敗之契丹  
兵小却

戊子銅霍貴寧等州皆降巴雅爾至努克特嶺遇敵兵戰  
敗之辛卯王詢遣使上表請朝許之禁軍士俘掠以政  
事舍人馬保佑為開京留守安州團練使旺布為副留  
守遣太子太師伊林將騎兵一千送保佑等赴京壬辰  
守將卓思正殺遼使者韓喜孫等十一人領兵出拒保

佑等還遣伊林領兵擊之思正遂奔西京圍之五日不克  
駐驛城西高麗禮部郎中渤海托實來降庚子遣巴雅爾  
文殊努等攻開京遇高麗兵敗之王詢棄城遁去遂焚開  
京至清江還

東國通鑑曰初王聞契丹兵至遣中郎將智蔡文將  
兵鎮和州以備東北及兆敗命蔡文移兵援西京蔡文即  
與軍容使崔昌進次剛德鎮甲寅契丹兵陷肅州盧  
顥為嚮導與契丹人劉經賁檄至西京諭降副留守

元宗與僚佐崔綿咸質揚澤文晏等修表欲降蔡  
文等聞之引兵至西京城門閉曷呼分臺御史曹子  
奇曰吾等奉王命倍道而來不納何也子奇具告顓  
經諭降之故遂開門蔡文入屯故宮南郭曷諷宗與  
執顓等固守宗與不從曷密與蔡文謀遣兵伏城北  
候顓等還掩殺之取其降表焚之時城中疑貳蔡文  
出屯城南獨大將軍鄭忠節從之俄而東北界都巡  
檢使卓思政率兵而至與之合軍復入城王以三軍

敗歙州郡陷沒上表請朝契丹主許之遂禁俘掠以馬保佑為開城留守旺布副之遣伊林將騎兵一千送保佑等乙卯契丹主又使韓杞以突騎二百至西京城北門呼曰皇帝昨遣劉經盧顗等賫詔曉諭奈何至今了無消息若不拒命留守官僚來聽我指諭思政聞杞語謀諸蔡文使麾下鄭仁等將驍騎突出擊斬杞等百餘人餘皆擒之無一人還者思政以蔡文為先鋒出與戰伊林保佑敗走於是人心稍安思

政還入城蔡文與李元出屯慈惠寺契丹主復遣伊  
林擊之邏卒報契丹兵來屯安定驛其勢甚盛蔡文  
馳告思政丙辰遂與僧法言率兵九千迎擊於林原  
驛南斬首三千餘級法言死之翌日蔡文復出戰契  
丹兵敗走於是城中將士登城以望競出迎之至馬  
灘契丹兵回軍擊敗之契丹主次於城西佛寺思政  
惧紹將軍大道秀曰君自東門出吾自西門出前後夾  
攻蔑不勝矣遂以麾下兵夜遁道秀出東門始知見

紹又力不可敵遂率所部降于契丹諸將皆潰城中  
洵懼已未統軍錄事趙元陞守鎮將薑民瞻卽將洪  
叶方休莫知所指乃共禱神祠筮得吉兆於是衆推  
趙元為兵馬使收散卒閉城固守辛未王南幸時智  
蔡文奔還奏西京敗軍狀羣臣議降薑邯贊獨曰今  
日之事罪在康兆非所恤也但衆寡不敵當避其鋒  
徐圖興復耳遂勸王南行蔡文請曰臣雖駑怯願在  
左右庶效犬馬之勞王曰昨李元崔昌奔還自請扈

從今不復見為臣之義果如是乎今卿勞于外又欲  
捍衛深嘉乃忠仍賜酒食及銀裝鞍轡是夜王與后  
妃及吏部侍郎蔡忠順等禁軍五十餘人出京城二  
年春正月乙亥朔契丹主陷京城焚燒太廟宮闕民  
屋皆盡是日王次廣州失兩王后所在令蔡文往尋  
之至饒谷驛乃得奉還王喜為留三日乙酉契丹兵  
退 高麗史曰顯宗二年夏四月乙丑遣工部郎中  
王瞻如契丹謝班師十月乙丑遣都官郎中金崇義

如契丹賀冬至十一月庚午遣刑部侍郎金殷傳如契丹賀生辰十二月契丹殺何拱辰又曰顯宗避契丹南幸何拱辰追謁于道奏曰契丹本以討賊為名今已得康兆若遣使請和彼必班師王筮得吉卦遂遣拱辰及高英起奉表狀往契丹營拱辰行至昌化縣以表狀授郎將張旻副將丁悅先往契丹軍言曰國王固願來覲第惧兵威又因內難出避江南遣陪臣拱辰等陳告事由拱辰等亦惶懼不敢前來請



速收兵旻等未至契丹先鋒已至昌化拱辰等具陳  
前意契丹問國王安在答曰今向江南不知所在又  
問遠近答曰江南太遠不知幾萬里追兵乃還明年  
拱辰與英起至契丹營乞班師契丹主許之遂留拱  
辰等拱辰既被留內圖還國外示忠勤契丹主甚加  
寵遇與英起密謀奏曰本國今已喪亡臣等願領兵  
點檢而來契丹主許之尋間王返國使英起居中京  
拱辰居燕京皆妻以良家女拱辰多市駿馬列置東

路以為歸計人告其謀契丹主韜之拱辰其以實對  
且曰臣於本國不敢有二心罪當萬死不願生事大  
朝契丹主義而原之諭令改節拱辰辭益厲不遜遂  
殺之爭取心肝食之

開泰元年秋八月己未高麗王詢遣田拱之奉表稱病  
不能朝詔復取六州地

高麗史曰顯宗三年夏四月契丹詔王親朝六月甲  
子遣刑部侍郎田拱之如契丹夏季問候且告王病

不能親朝契丹主怒詔取興化通州龍州鐵州郭州  
龜州等六城九月己巳遣西頭供奉官文儒領如契  
丹來遠城冬十月庚午遣工部尚書參知政事張瑩  
禮部侍郎劉徵弼如契丹癸未契丹使太尉韓邠來  
十二月庚寅張瑩與契丹引進使李延弘來

冬十二月

契丹國志曰十二月朔日食 司馬光涑水紀聞曰  
祥符中王沂公奉使契丹館伴邢祥頗肆談辨深自

銜鬻且矜新賜鐵券公曰鐵券者蓋勲臣有功高不  
賞之惧賜之以安反側耳何為輒及親賢祥大沮

鶚按王魯奉使契丹遼宋兩史俱未載故不知確是  
何年因附于此曾有上契丹事一卷

二年秋九月

高麗史曰顯宗四年春正月丁酉遣禮賓少卿張洎  
如契丹庚寅遣中樞院使蔡忠順如契丹三月戊申  
契丹使左監門衛大將軍耶律行平來責取興化等

六城夏五月丁酉契丹來告改統和為開泰壬寅女  
真引契丹兵渡鴨綠江大將軍金承渭等擊却之秋  
七月戊申契丹使耶律行平復來索六城 續資治  
通鑑長編曰大中祥符六年九月乙卯以翰林學士  
晁迥為契丹國主生辰使崇儀副使王希範副之龍  
圖閣侍制查道為正旦使供奉官闔門祗候蔚信副  
之

三年夏六月

契丹國志曰六月朔日食

冬十月

東國通鑑曰顯宗元文王五年冬十月契丹遣國舅  
詳袞蕭迪里來侵通州興化鎮將軍鄭仁勇別將周  
演擊敗之斬七百餘級溺江死者甚衆

十二月

釋文瑩玉壺清話曰祥符中契丹使至因言本國喜  
誦魏野詩但得上帙願求全部真宗始知其名將詔

之死已數年搜其詩果得草堂集十卷賜之

四年春正月壬寅東征

高麗史曰顯宗六年春正月契丹作橋于鴨綠江夾  
橋築東西城遣將攻破不克癸卯契丹兵圍興化鎮  
將軍高積餘趙弋等擊却之甲辰又侵通州乙亥契  
丹侵龍州 又曰夏四月契丹使將軍耶律行平來  
又索六州拘留不遣 又曰九月甲寅契丹使監門  
將軍李松茂來索六城己未契丹來攻通州興化鎮

大將軍鄭神勇別將周演散員任憶校尉楊春太醫  
丞孫簡太史丞康承穎等引兵出契丹軍後擊殺七  
百餘級神勇等死之丁卯契丹攻寧州城不克而退  
大將軍高積餘將軍蘇忠元高延迪散員金己別將  
光參等追擊死之契丹兵擄兵馬判官王佐錄事盧  
元佐而去是歲契丹取定遠興化二鎮城之

五年

高麗史世家曰顯宗七年春正月庚戌契丹耶律世



良蕭庫哩侵郭州我軍與戰死者數萬人獲輜重而  
歸甲寅契丹使十人到鴨綠江不納二月契丹王美  
延祥等七人來奔甲辰契丹曹恩高和等六人來投  
夏五月契丹瑪爾保良旺布庫爾森等十三戶來投乙  
丑契丹揚丹等三人來投六月戊寅契丹志甫等三  
人來投乙酉契丹張烈行色實塔舒爾王忠等三十  
戶來投秋七月丁巳契丹由道高宗等九人來投八  
月朱簡從道等八人來投九月契丹羅肯等五人來

投辛未契丹奉春大誥里等十九人來投冬十一月  
契丹匡徹爾等十人來投十二月乙未契丹色佛埒  
等六人來投

冬十二月丁酉宋遣張遜王承德來賀千齡節

續資治通鑑長編曰大中祥符九年九月乙酉命樞  
密直學士工部侍郎薛昉為契丹國主生辰使東染  
院使劉承宗副之壽春郡王友戶部郎中直昭文館  
張士遜為正旦使供備庫使王承德副之 鶚按遼

史以張遜王承德來賀千齡節而失載薛映等誤

六年夏五月

東國通鑑曰顯宗元文王八年夏五月契丹蕭和卓  
圍興化鎮攻之九日不克將軍堅一洪光高義出戰  
大敗之斬獲甚多

六月

契丹國志曰六月彗出北斗

本紀第十六

聖宗七

七年春三月

契丹國志曰春三月朔日食

冬十二月蕭巴雅爾等與高麗戰於茶陀二河遼軍失利  
天雲右皮室二軍沒溺者衆約尼帳詳袞阿克達客省  
使卓庫渤海詳袞高清明天雲軍詳袞哈里等皆死之  
東國通鑑曰顯宗元文王九年九月遣禮賓少卿元  
承如契丹請和戊戌契丹駙馬蕭遜寧帥兵來侵號

十萬王以平章事薑邯贊為上元帥大將軍薑民瞻  
副之率兵二十萬八千三百屯寧州至興化鎮選騎  
兵一萬二千伏山谷中又以大繩貫牛皮塞城東大  
川以待之敵至決塞發伏大敗之邈寧引兵直趨京  
城民瞻追及于慈州來口山大敗之侍郎趙元又擊  
於馬灘斬獲萬餘級 鶚按茶陀之戰東國通鑑月  
日與史異

八年春正月

東國通鑑曰顯宗元文王十年春正月庚申薑邯贊以契丹兵逼城遣兵馬判官金宗鉉領兵一萬倍道入衛京城東北面兵馬使亦遣兵三千三百入援辛酉蕭遜寧至新恩縣去京城百里王命收城外民戶入內清野以待遜寧遣耶律好德賫書至通德門告以回軍潛遣候騎三百餘至金郊驛王遣兵一百乘夜掩殺之辛巳契丹回兵至漣渭州薑邯贊等掩擊斬五百餘級又曰二月己丑朔薑邯贊擊契丹兵

于龜州大敗之時契丹兵過龜州邯鄲等邀戰于東郊兩軍相持勝敗未決金宗鉉引兵赴之忽風雨南來旌旗北指我軍乘勢奮擊勇氣百倍契丹兵奔北我軍追擊之涉石川至於盤嶺僵尸蔽野俘獲人口馬駝甲冑兵仗不可勝數生還僅數十人契丹兵之敗未有如此時之甚契丹聞之大怒遣使責遼寧曰汝輕敵深入以至於此何面目見我乎朕當皮面然後戮之又曰八月契丹東京使工部少卿高應壽

來遣考功員外郎李仁澤如契丹東京東國史畧  
曰契丹蕭遜寧來侵薑邯贊薑民瞻等前後戰于興  
化鎮及邑州大破之以薑邯贊檢校太尉門下侍郎  
天水縣開國男

九年春二月

東國通鑑曰顯宗元文王十一年春二月遣李作仁  
如契丹請稱藩納貢如故遂歸所留耶律行平等八  
月遣崔齊顏如契丹賀千齡節



太平元年春二月三月

東國通鑑曰顯宗元文王十二年春二月契丹遣御史大夫姚居信來聘三月契丹東京使散騎常侍張澄岳來聘

秋七月乙亥遣誥里取石晉所上玉璽于中京

孔平仲珩璜新論曰仁宗朝有使遼者見遼主傳國璽詩云一時製美寶千載助興王中原既失守此寶歸北方子孫宜慎守世業當永昌

二年春二月丁丑宋使薛貽廓來告宋主恒殂子禎嗣位遣都點檢耶律僧隱等充宋祭奠使副林牙蕭日新觀察馮延休充宋后弔慰使副戊寅遣金吾耶律錫林引進姚居信充宋主弔慰使副

續資治通鑑長編曰乾興元年二月戊午上崩于延慶殿仁宗即皇帝位遣內殿承制闔門祇候薛貽矩告哀契丹契丹主聞真宗崩舉哀號慟因謂其宰相呂懋德曰與南朝約為兄弟垂二十年忽報登遐吾

雖少兩歲願餘生幾何因復大慟又曰聞嗣皇尚少  
恐未知通好始末苟為臣下所間奈何及薛貽矩至  
具道朝廷之意契丹主喜謂其妻蕭氏曰汝可致書  
太宗皇太后使汝名傳中國乃設真宗靈御于范陽  
憫忠寺建道場百日下令國中諸犯真宗諱者悉易  
之遣殿前都點檢崇義節度使耶律僧隱翰林學士  
工部侍郎知制誥馬貽謀來祭奠右金吾衛上將軍  
耶律寧引進使姚居信來弔慰右金吾衛將軍蕭日

新利州觀察使馮延休吊慰皇太后 謝維新合璧  
事類後集曰真宗上仙遣薛貽廓使于是有告哀之  
名遣薛田使於是遣留禮物之名遣任中行使於是  
有告登寶位之名遣劉錯趙賀使於是皇太后皇  
帝迴謝禮物之名孰鶚按薛貽廓李燾作貽矩未知  
孰是

夏四月

東國通鑑曰顯宗元文王十三年夏四月契丹遣御

史大夫蕭懷禮等來冊王開府儀同三司守尚書上柱國高麗國王食邑一萬戶食實封一千戶仍賜車服儀物自是復行契丹年號

秋八月

續資治通鑑長編曰乾興元年八月壬寅以禮部郎中知制誥張師德為契丹妻蕭氏生辰國信使西京左藏庫副使趙忠輔副之東國通鑑曰契丹東京持禮使李克方來言自今春夏季問候使并差一次與

賀千齡節正旦使同行秋冬季問候使并差一次與  
賀太后生辰使同行

三年夏四月

東國通鑑曰顯宗元丈王十四年夏四月契丹遣左  
散騎常侍武白耶律克恭來冊太子欽為輔國大將  
軍檢校太師守太保兼侍中高麗國公

本紀第十七

聖宗八

五年春正月

續資治通鑑長編曰天聖三年正月戊子契丹遣宣徽南院使朔方節度使蕭從順樞密直學士給事中韓紹方來賀長寧節

冬十月辛未宋太后遣馮元宗史方來賀順天節

續資治通鑑長編曰天聖三年九月庚辰朔以戶部郎中知制誥夏竦為契丹生辰使內殿承制閣門祗候史方副之度支副使兵部郎中姜遵為正旦使內

殿承制閣門祗候許懷信副之右正言直史館張規  
為契丹妻正旦使東頭供奉官閣門祗候趙應副之  
竦自言父承皓與契丹戰沒母喪未期義不可行改  
命工部郎中龍圖閣待制馮元宗 契丹國志十月  
朔日食

十二月

續資治通鑑長編曰天聖三年十二月癸未契丹遣  
彰聖軍節度使蕭默色潘州觀察使鄭文園來賀皇



太后正旦

乙亥宋使李維張綸來賀千齡節

續資治通鑑長編曰維往使契丹主素服館勞加禮  
即席賦兩朝悠久詩下筆立成契丹主大喜

六年春正月

續資治通鑑長編曰天聖四年正月癸未契丹遣樞  
密副使彰武節度使蕭廸里歸義節度使康筠來賀  
長寧節

冬十月乙丑宋遣韓翼田承說來賀順天節

續資治通鑑長編曰天聖四年七月乙丑工部郎中  
龍圖閣待制韓億為契丹妻生辰使崇儀副使田承  
說副之詔億名犯北朝諱權改曰意承說皇太后之  
姻也庸而自專妄傳皇太后旨于契丹曰南北歡好  
傳示子孫兩朝之臣勿相猜阻億初不知也契丹主  
命別置宴使其大臣來伴且問億曰太后有旨大使  
宜知之何獨不言億對曰本朝每遣使太后必於簾

前以此語戒之非欲達于北朝也契丹主聞之大喜  
舉手加額曰此兩朝生靈之福也 鶚按宋以遼太

祖諱改韓億名意遼史改曰翼猶以億字之半避嫌  
名爾

七年春正月壬寅朔宋遣張保維孫繼業孔道輔馬崇  
至來賀

續資治通鑑長編曰孔道輔使契丹契丹燕使者優  
人以文宣王為戲道輔艷然徑出契丹使主客者邀

道輔還坐且令謝道輔正色曰中國與北朝通好以禮文相接今俳優之徒侮慢先聖而不之禁北朝之過也道輔何謝契丹君臣嘿然

夏四月

續資治通鑑長編曰天聖四年夏四月辛巳契丹遣林牙昭德節度使杜防政事舍人蕭蘊賀乾元節記纂淵海曰天聖五年契丹遣蕭蘊杜防來以程琳為館伴蘊出坐位指曰中國使者至契丹坐位殿上

今契丹使至中國不然請升之琳曰此真宗皇帝所  
定不可易防不能對曰令宰相議或曰此細事耳將  
許之琳曰後更有大者奈何遂止

八年

東國通鑑曰顯宗文元王十九年春二月遣禮部員  
外郎金哥如契丹東京契丹遣將軍耶律素等來聘  
冬十二月丁亥宋遣寇瑊康德來賀千齡節

郡齋讀書志曰生辰國信語錄一卷皇朝寇瑊與康

德於天聖六年使契丹賀其主生辰往返語錄并景德二年至天聖八年使副姓名及雜議于後

九年秋八月己丑東京錫里軍詳袞大延琳因留守駙馬都尉蕭孝先及南陽公主殺戶部使韓紹勳副使王嘉四捷軍都指揮使蕭佛德延琳遂僭位號其國為興遼年為天慶

東國通鑑曰顯宗文元王二十年九月契丹東京將軍大延琳遣大府丞高吉德告建國兼求援延琳渤

海始祖大祚榮七代孫叛契丹國號興遼建元天興  
十二月興遼國太師大延定引東北女真與契丹相  
攻遣使乞援王議諸輔臣侍中崔士威平章蔡忠順  
言兵者危事不可不慎彼之相攻安知非我利耶但  
可修城池謹烽燧以觀變耳王從之自此路梗與契  
丹不通

十年秋八月丙午東京賊將楊詳世密送款夜開南門  
納遼軍擒延琳渤海平

東國通鑑曰顯宗文元王二十一年秋九月興遼國  
郢州刺史孝匡祿來告急尋聞國亡遂留不歸遣金哥  
如契丹賀收復東京契丹遣千牛將軍羅漢努來詔  
曰近不差人往返為路梗今渤海偷主俱遭圍閉並  
以歸降宜遣陪臣速來赴國必無虞患

十一年夏六月丁丑朔駐驛大福河之北己卯帝崩于  
行宮年六十一在位四十九年景福元年閏十月壬申  
上尊諡曰文武大孝宣皇帝廟號聖宗



九朝編年備要曰隆緒自與朝廷通好歲貢方物無  
巨細必親閱之守約甚固至是病劇召東平王蕭孝  
先使輔立其子宗真戒無失朝廷信誓 契丹國志  
曰先是承天太后未歸政前帝已長立每事拱手或  
府庫中需一物必詰其所用賜及文武臣僚者允之  
不然不與帝既不預朝政縱心弋獵左右狎邪與帝  
為笑謔者太后知之重行杖責帝亦不免詬問御服  
御馬皆太后檢校焉或宮嬪譏帝太后信之必庭辱

帝每承順畧無怨辭好讀唐貞觀事要至太宗明皇  
實錄則欽伏故御名連明皇諱一字又親以契丹字  
譯白居易諷諫集詔蕃臣等讀之嘗云五百年來中  
國之英主遠則唐太宗次則後唐明宗近則今宋太  
祖太宗也或諸道進貢珍奇一無所取皆讓其弟親  
政後太后暴崩帝哀毀骨立哭必嘔血番漢羣臣上  
言山陵已畢宜改元帝曰改元吉禮也居喪行吉禮  
乃不孝子也羣臣曰古之帝王以日易月宜法古制

帝曰吾契丹主也寧違古制不為不孝之人終制三年帝性英辨多謀神武冠絕遊獵時曾遇二虎方逸帝策馬馳之發矢連殪其二虎又曾一箭貫三鹿時幽州試舉人以一箭貫三鹿為賦題駙馬劉三叔獻射二虎頌至于道釋二教皆洞其旨律呂音聲特所精徹承平日久羣方無事縱酒作樂無有虛日與番漢臣下飲會皆連晝夕復盡去巾幘促席造膝而坐或自歌舞或命后妃以下彈琵琶送酒又喜吟詩出

題詔宰相以下賦詩詩成進御一一讀之優者賜金  
帶又御製曲五百餘首幸諸臣私第為會時謂之迎  
駕盡歡而罷刑賞必信無有僭差撫柔諸番咸有恩  
信修睦宋朝人使餽送躬親檢校時黃河暴漲溺會  
同驛帝親擇夷坦地復創一驛每年信使入境先取  
宋朝登科記驗其等甲高低及第年月其賜賚物則  
密令人體探宋真宗上仙薛貽廓報哀入境幽州急  
遞先聞帝不俟貽廓至闕集番漢大臣舉哀后妃以

下皆為沾涕因謂宰臣呂德懋曰吾與兄皇未結好  
前征伐各有勝負洎約為兄弟二十餘年兄皇升遐  
況與吾同月生年大兩歲吾又得幾時也因又泣復  
曰吾聞侄帝聖年尚幼必不知兄皇分義恐為臣下  
所間與吾違拗矣後貽廓至闕達宋聖意喜謂后曰  
吾觀侄帝來意必不失兄皇之誓復謂呂德懋曰晉  
高祖承嗣聖爺爺之力深矣嗣聖太宗也  
爺爺翁呼也少主登位  
便背盟約皆臣下所惑今侄帝必敦篤悠久矣又謂

后曰汝可先貽書與南朝太后備述妯娌之分使人  
往來名傳南朝又詔燕京憫忠寺特置真宗御靈建  
資福道場百日而罷復詔沿遼州軍不得作樂後因  
御宴有教坊都知格守樂名格子眼轉充色長因取  
所譜宣讀帝欲更遷一官見本名正犯真宗諱因怒  
曰汝充御坊首領豈不知兄皇諱字遂以筆抹其宣  
而止燕京僧錄亦犯真宗諱飭更名圓融尋下令國  
中應内外文武百僚僧道軍人百姓等犯真宗諱者

悉令改之詔漢兒公事皆須體問南朝法度行事不得造次行事其飲重宋朝百餘事皆此類也末年染病渴疾多忌諱稱說死亡之人雖帝之父母尊號亦不得言之病亟乃驛召東平王蕭孝穆上京留守蕭孝先赴闕始以輔立之事面委之次以不得失宋朝之信誓而囑之又囑其子宗真曰皇后事我四十年以其無子故命汝為嗣我死汝子毋切毋殺之六月三日崩於上京東北三十里大斧河之行帳年六十

一在位通太后臨朝凡四十九年葬上京西北二百  
里赤山廟號聖宗

遼史拾遺卷八



欽定四庫全書

遼史拾遺卷九

錢塘厲鶚 撰

本紀第十八

興宗一

興宗神聖孝章皇帝諱宗真字雅布濟小字濟古爾聖宗  
長子改元景福

契丹國志曰興宗皇帝諱宗真番名實卜克聖宗第

八子順聖元妃所生帝生于顓州東錐子河

秋九月辛亥宋遣王隨曹儀致祭王駿許懷信梅詢張  
綸來慰兩宮范諷孫繼業賀即位孔道輔魏昭文賀皇  
太后冊禮

續資治通鑑長編曰天聖九年夏六月雄州以契丹  
主聖宗訃聞命御史中丞王隨為祭奠使西上閣門  
使曹儀副之龍圖閣待制孔道輔為賀登位使崇儀  
副使孫繼業副之鹽鐵副使司封員外郎王駿為國

主弔慰使內殿承制閣門祗候許懷信副之秋七月  
丙午朔契丹使奉陵軍節度使耶律竒爾錫默告哀戊  
午命樞密直學士寇瑊為賀契丹登位使改賀登位  
使孔道輔為契丹母冊禮使西染院使魏昭文副之  
鶚按賀即位使長編作寇瑊遼史作范諷未知孰是  
高麗史王可道傳曰德宗即位遣工部郎中柳喬  
郎中金行恭如契丹會葬且賀即位可道奏契丹與  
我通好交贊然每有并吞之志今其主殂駙馬必塔

叛據東京宜乘此時請毀鴨綠城橋歸所留我行人  
若不聽可與之絕乃附表請之契丹不從王從可道  
議停賀正使仍用聖宗太平年號

重熙元年春二月

契丹國志曰春二月有星孛于東北光芒長二尺

夏六月

契丹國志曰夏六月朔日食

二年秋八月

契丹國志曰秋八月有星孛于張翼長七尺濶五寸  
十二日而沒

三年春正月丁卯宋使章頻卒詔有司賻贈命近侍護  
喪以歸

夢溪筆談曰天聖中侍御史知雜事章頻使遼死于  
道其地無棺槨輿至范陽方就殮自後遼人常造數  
漆棺以銀飾之每有使入境則載以隨行至今為例  
夏五月皇太后還政于上躬守慶陵

契丹國志曰法天皇后專制多殺功臣用蕭氏兄弟分  
監南北番漢使蕭氏奴為團練防禦觀察節度使者  
至四十餘人范陽無賴輩多占名樂工為蕭氏奴帝  
以上尊酒銀帶賜樂工太后鞭樂工文五格帝知內  
品高慶郎告太后使左右殺高慶郎太后愈怒下吏  
雜治語連于帝帝曰我貴為天子而與囚同答狀耶  
鬱鬱不樂與耶律喜孫謀率兵逐母法天太后登黃  
布車載送慶州守聖宗冢遂誅永興軍都總管剛叟

及內侍數十族命內庫都提點王繼恩內侍都知趙安仁等監南北面番漢臣僚每歲宋朝自聖宗太平四年遣使賀帝生辰及元旦賀太后則別遣使至是不復別遣至重熙八年迎回法天太后乃遣使如故冬十二月宋遣段少連杜仁贊來賀來歲正旦楊偕李守忠來賀永壽節

續資治通鑑長編曰景祐元年八月度支判官兵部員外郎直集賢院謝絳為丹契生辰使內殿承制閣

門祇候李守忠副之度支判官刑部員外郎直集賢院段少連為正旦使供奉官閣門祇候杜費副之  
鶚按史以謝絳為楊偕未知孰是

四年

契丹國志曰帝因獵過祖州白馬山見齊天太后墳冢荒穢又無影堂及埽灑人戶惻然而泣左右皆沾涕因詔上京留守耶律贊寧監鐵使郎元化等于祖州陵園內選吉地改塋其影堂廊庫等並同宣獻太



后園陵

夏五月

東國通鑑曰靖宗恭惠王元年五月契丹來遠城牒興化鎮曰竊念貴國元為附庸先帝每賜優洽積有歲月靡僂梯航昨因伐罪之年致阻來庭之禮既剪除于允送合繼續于貢輸曷越數年不尋舊好累石城而擬遮大路監木寨而欲礙奇兵不知蜀國之中別有石牛之徑舉是役也深取誚也今皇上紹累聖

之基垌統八方之國界南夏帝王永慕義而通歡西  
上諸王長向風而納款唯獨東溟之域未賓北極之  
尊或激怒于雷霆何安寧于黎庶

五年秋七月

契丹國志曰秋七月有星數百從西南流至壁東其  
光燭地黑氣長丈餘出畢宿下

六年春正月

契丹國志曰春正月有衆星西北流

秋八月

契丹國志曰秋八月熒惑犯南斗

冬十二月

東國通鑑曰靖宗恭惠王三年冬十二月遣殿中少監崔延嘏如契丹奏狀云當國伏自前皇太后聖帝降冊命以頒宣疏土封而定分但茲東城仰戴北辰連年不絕以勤王遞代相傳而述職頃以先臣亡兄纂承祖業歸附皇朝聞一德之君臨新頒慶澤時兩

條之公事專奏宸聰未垂俞允之恩轉積遲疑之慮  
自從曩歲以到今辰雖送換于炎涼且久停于朝貢  
近蒙睿旨頗愜鄙懷謹當遵太后之遺言固為藩屏  
撫小邦之弊俗虔奉闕庭更從文軌以輸誠永效梯  
航而展禮

七年春二月丁丑高麗遣使來貢

東國通鑑曰靖宗恭惠王四年春三月崔延嘏奏詔  
還自契丹詔曰御世稟聲朔歲奉梯航近覽奏章備

觀誠懇嘉嘆良多勉思永圖無曠述職秋八月始行

契丹年號遣侍禮使閣門祇候金華彥如契丹東京

高麗史曰靖宗四年正月戊戌朔契丹遣馬保業

來夏四月遣尚書左丞金元冲如契丹起居謝恩仍

請年號秋七月甲寅金元冲還自契丹詔曰省所上

表夏李起居事具悉御挺生方畧善撫世封得愛戴

于東韓盡傾虔于北闕屬歆蒸之在候馳章奏以問

安嘉矚之懷每興增切又詔曰省所上表謝恩令朝

貢并進捧金吸餅銀菜瓶幘頭紗紵布貢平布腦原  
茶大紙細墨龍鬚登席等事具悉仰權司國宇敬奉  
朝廷昨遣使人遠敷忠款述累世傾輸之節遠近年  
限阻之由乞重效于梯航願永為于藩翰載觀恭順  
尋示允從煩致謝章仍陳貢篚願閱之際媿嘆良深  
又詔曰省所奏已行用重熙年號事具悉仰昨者乞  
修朝貢尋允奉陳使介回旋知我紀年之號書文稟  
用見其向日之誠省覽歡嘉不忘於意

八年春正月壬辰朔宋遣韓琦王從益來賀

韓琦安陽集使回戲成詩曰專對慙非出使才拭圭

申好歛旌回禮煩偏苦元正拜

北庭元日拜禮最煩

戶大猶輕

永壽盃

永壽北主生辰節名其日以大白酌南使

歌枕頓無歸夢擾據鞍

潛覺旅懷開明朝便是侵星去不怕東風拂面來

契丹國志曰春正月朔日食 高麗史曰靖宗五年

夏四月辛酉朔契丹遣大理卿韓保衡來冊王詔曰

地控東域星環北辰愈堅奉上之心宜舉策勲之典

遐馳使馭載啓王封是謂恩榮所宜祇荷今差大理  
卿韓保衡往彼賜卿官誥一通勅牒一道到可祇受  
官誥曰朕體天洪覆酌古通規內則推邦家懷遠之  
誠外則付王國專征之柄航棧不可以輕入車書不  
可以妄同庶及羣雄永全大義與其軒習弧矢而夏  
陳干戚曷苦周分藩屏而漢誓山河其有業重桓文  
望高辰卜紹祖宗之云始革先王之不恭貢土疆而  
廣我提封奉玉帛而首諸方面安和是務忠肅為容



宜舉彞章特敷龍數權知高麗國王奇姿玉瑩偉量  
淵停鰲丘聳架海之雄旁鍾秀拔龍宿挺麗天之采  
俯降精英而自守名區大開霸府動靜先遵于典則  
寐興能制于驕矜千里甸畿先臻富庶一方民俗咸  
荷恩榮成奕世之令名得殿邦之異略是用專馳駢  
轡遠降龍綸元菟全封榮加于一字溫貂峻秩兼示  
于三師馭賁崇階褒功懿號廣疏井賦茂獎忠庸於  
戲星辰在拱北之躔則為合度江漢得朝宗之路乃

是安流勉服斯言勿煩常訓可授開府儀同三司守太保兼侍中上柱國高麗國王食邑七千戶食實封一千戶仍賜輸忠保義奉國六字功臣

秋七月丁巳謁慶陵致奠于望仙殿迎皇太后至顯州謁園陵還京

契丹國志曰先是帝于重熙三年幽法天太后于慶州既改葬齊天后羣僚勸帝復迎之且以覲宋朝歲聘之利皆不從因命僧建佛事聽講報恩經感悟即

遣使迎法天太后館置中京門外筮曰以見母子如初  
隆平集曰天聖末宗真立隆緒之第八子也母  
曰順聖元妃隆緒遺命以正室齊天皇后為太后元  
妃蕭氏為太妃太妃殺齊天而自立為太后多殺戮  
功臣而自用其兄弟御宗真甚嚴宗真不能堪景佑  
初率兵逐其母使守隆緒冢其國人有勸迎其母以  
覲朝廷歲賜之物雖從之而所居相距常十餘里蓋  
懼其或相害爾

九年春正月丙辰朔宋遣王拱辰彭再思來賀

夢溪筆談曰慶歷中王君貺使契丹宴君貺于混融江觀釣魚臨歸契丹主置酒謂君貺曰南北修好歲久恨不得親見南朝兄皇帝托卿為傳一盃酒到南朝乃自起酌酒容甚恭親授君貺舉盃又自鼓琵琶上南朝皇帝千萬歲先是契主之弟重元為燕王有全燕之衆久蓄異謀契主恐其陰附于朝廷故特效恭順重元後卒以稱亂誅 鷄按沈括世父名同故

諱混同江為混融江

本紀第十九

興宗二

十年冬十二月丙子朔宋遣劉沆王整來賀應聖節

劉攽中山詩話曰劉沆使北契丹館客曰有酒如澠  
繫行人而不住沆應聲曰在北曰狄吹出塞以何妨

十一年春正月庚戌遣南院宣徽使蕭特默翰林院學  
士劉六符使宋取晉陽及瓦關以南十縣地且問興師

伐夏及汭邊疏濬水澤增益兵戍之故

續資治通鑑長編曰慶歷二年三月己巳契丹遣宣  
徽南院使歸義節度使蕭英翰林學士右諫議大夫知  
制誥同修國史劉六符來致書曰弟大契丹皇帝謹致  
書凡大宋皇帝粵自世修歡契時遣使輶封圻殊兩  
國之名方冊紀一家之美蓋欲洽於綿永固將有以  
披陳切緣瓦橋關南是石晉所割迄至柴氏以逮郭  
周興一旦之狂謀掠十縣之故壤人神共怒廟社不

延至于貴國祖先肇創基業尋與敵境繼為善隣暨  
乎太宗紹登寶位於有征之地才定并汾以無名之  
師直抵燕薊羽名精銳禦而獲退遂致移鎮國強兵  
南北王府并內外諸軍彌年有戍境之勞繼日脩渝  
盟之事始終反覆前後不常竊審專命將臣往平河  
右炎涼屢易勝負未聞兼李元昊於北朝今已稱藩  
累曾尚主克保君臣之道實為甥舅之親設罪合加  
誅亦宜垂報邇者郭稹特至杜防又回雖具音題但

虞詐謀已舉殘民之伐曾無忌噐之嫌營築長堤填塞要路開決塘水添置邊軍既潛稔於猜嫌慮難敗於信睦倘思久好共遣懷疑曷若以晉陽舊附之區關南元割之縣俱歸當國共康黎人如此則益深兄弟之懷長守子孫之計納惟英晤深遠悃悰適屆春陽善綏冲裕福祉便蕃淑問逖傳龍光遠被云云

太平治迹統類曰慶厯三年春三月劉六符蕭英以書來求關南十縣正月己巳邊吏言契丹泛使且至



朝廷為之旰食歷選可使契丹者宰相呂夷簡舉右  
正言知制誥富弼入對便殿叩頭曰主憂臣辱臣不  
敢愛其死上為之動色壬申命弼為接伴以二月丙  
子發京師至雄州久之英等始入境遣中使慰勞英  
稱足疾不拜弼謂曰吾嘗使北卧病車中聞命輒拜  
令中使至而君不起此何禮也英矍然起遂使人掖  
而拜弼察英等自以契丹先違盟及其從者皆有懼  
色可動故每與之開懷盡言冀以鈎得其情英等以

故亦推誠無隱乃密以其主所欲者告弼且曰可從從之不從更以一事塞之王者愛養生民舊好不可失也弼具以聞及英等至命御史中丞賈昌朝館伴朝廷議所欲與不許割地而許以信安僖簡王允寧女與其子梁王洪基結婚或增歲賂獨弼以結婚為不可 龍川別志曰慶歷中契丹使劉六符求和親賈昌朝館伴未有以拒之先是宗真之弟號太弟者用事橫于國中因信使嘗通書幣仁宗使昌朝謂六

符欲因今使答之六符辭曰此於太后甚善然于本朝不便曷朝因曰即如此欲以太宗真宗之子求和親皇帝豈安心乎六符不能答自是和親之議頗息

夏五月

契丹國志曰夏五月朔日食

六月乙亥宋遣富弼張茂實奉書來聘以書答之

續資治通鑑長編曰夏四月庚辰詔以右正言知制誥富弼為回謝契丹國信使西上閤門使符惟忠副

之復書曰昔我烈考章聖皇帝保有基圖惠養黎庶  
與大契丹昭聖皇帝弭兵講好通聘著盟肆余纂承  
共遵謨訓邊民安堵垂四十年茲者專致使臣特詔  
緘問且以瓦橋內地晉陽故封拔石氏之割城述周  
朝之復境繫于異代安及本朝粵自景德之初始敦  
隣國之信凡諸細故咸不寘懷况太宗皇帝親駕并  
郊匪圖燕壤當時貴國亟發援兵既交石嶺之鋒遂  
舉薊門之役義非反覆理有因緣元昊賜姓稱藩稟

朔受祿急謀狂僭倣擾邊陲羣議討除已嘗聞達杜  
防郭稹傳述備詳及此西征豈云無報聘軺旁午屢  
聞嫉惡之談慶問交馳未諭睽親之故忽窺異論良  
用惘然謂將軫于在原反致譏于忌噐復云營築隄  
埭開決陂塘昨緣霖潦之餘大為衍溢之患既非疏  
導當稍繕防豈蘊猜嫌以虧信睦至于備塞隘路閱  
習兵夫盡邊臣謹職之常乃卿兵充籍之舊在于貴  
境寧撤戍兵一皆示於坦夷兩何形于疑阻願惟歡

契方保悠長遽興請地之言殊非載書之約信辭至  
恚靈鑒孔昭兩地不得相侵緣邊各守疆界誓書之  
外一無所求期在久要弗違先約諒惟聽達應切感  
思甫屬清和妙臻戩穀自餘令弼口陳書詞翰林學  
士王拱辰所撰也五月癸丑命知具州供脩庫使恩  
州團練使張茂實為回謝契丹國信副使代符惟忠  
也惟忠行至武強病卒富弼請以茂實代之詔從其  
請契丹國志曰初有涿州進士梁濟世嘗主文書

于帳下一日得罪歸宋言契丹將有割地之請又知  
雄州杜惟序亦先得其事以聞至是宋仁宗發書示  
輔臣色皆不動六符亦疑其書之先漏夏四月宋遣  
知制誥富弼往契丹為回謝使西上閤門張茂實副  
之弼至契丹與帝往反論難力拒其割地之意遼帝  
感悟遂欲求婚弼曰婚姻易于生隙人命修短不可  
知豈若歲幣之為堅久本朝長公主出降齎送不過  
十萬緡豈若歲幣無窮之利帝曰卿且歸再來當擇

一事為報并以誓書來弼歸復命

八月丙申宋復遣富弼張茂實奉書來聘乞增歲幣銀絹以書答之

契丹國志曰八月宋再命富弼同張茂實齎書至契丹書曰來書云章聖皇帝與昭聖皇帝誓書每歲以絹二十萬疋銀十萬兩以助軍旅之費今以兩朝修好三紀於茲闕南縣邑本朝傳守已久俱難依從每年更增絹十萬疋銀十萬兩恭惟二聖威靈在天願



茲纂承各當遵奉共循大體無介小嫌餘依景德統  
和兩朝誓書帝不復求婚而意在增幣乃曰南朝與  
我書當曰獻否則曰納弼固爭不可帝曰吾當遣人  
議之于是留所許增幣誓書復使耶律仁先劉六符  
以誓書詣宋求為獻納弼奏曰臣以死拒之可勿許  
且無能為也帝從之時契丹固惜盟好特為虛聲以  
動宋朝宋方困西夏許予過厚契丹既歲得金帛五  
十萬因勒碑紀功擢劉六符為顯官

九月壬寅遣北院樞密副使耶律仁先漢人行宮副部  
署劉六符使宋約和是時富弼為上言大意謂遼與宋  
和坐獲歲幣則利在國家臣下無與與宋交兵則利在  
臣下害在國家上感其言和好始定

洪邁容齋四筆曰富公奉使契丹契丹主言欲舉兵  
公曰北朝與中國通好則人主專其利而臣下無所  
獲若用兵則利歸臣下而人主任其禍故北朝羣臣  
爭言舉兵者此皆其自謀非國計也勝負未可知就

使其勝所亡士馬羣臣當之歟抑人主當之歟是時  
語錄傳于四方蘇明允讀至此曰此一段議論古人  
有之否東坡未十歲在旁對曰記得嚴安上書云今  
狗南夷朝夜郎略歲州建城邑深入匈奴燔其龍城  
議者美之此人臣之利非國家之長策也正是此意  
明允以為然王鞏聞見近錄曰寶元康定間西人  
犯邊用兵累歲遼人窺我遣人求闕南之地富文忠  
既行疑時相與已不協輒發國書觀之乃與所授詞

果異歸請對具言之詔付文忠詣學士院視學士改書然後行元授五函皆許其添歲賜也每出一函待不從然後旋出之文忠輒留二函於雄州既至文忠抗論不屈徐出一書遼人意未厭復出一書至於三遼人密探文忠篋中止有三書遂從約文忠使還持二函以歸歲減聘幣者二十萬 太平治迹統類曰富弼張茂實以八月乙未至契丹清泉入金檀館持國書二誓書三以語館伴耶律仁先劉六符問所以

然者弼曰姻事合則以姻事誓能令夏國復歸款則  
歲入金帛增二十萬否則十萬國書所以有二誓書  
所以有三也翌日引弼等見契丹主太弟宗元子梁  
王洪基侍蕭孝思考穆馬保忠杜防分立帳外契丹  
主曰姻事使南朝骨月睽違或公主與梁王不相和  
悅則將奈何固不若歲增金帛但患無名耳湏於誓  
書加一獻字富弼曰此乃下奉上之辭非可施于敵  
國况南朝為兄豈可兄獻于弟乎契主曰改為納字

何如弼曰自古惟唐高祖借兵于突厥故臣事之當日所遺或稱獻納不可知其後顏利為太宗所擒豈復更有此理契丹主默然弼遂面與劉六符言指帳前高山曰此尚可踰若獻納二字則如天不可得而升也使臣頭可斷此議斷不敢諾於是契丹留所許二十萬誓書復遣耶律仁先劉六符賁其國誓書來仍求納字是月弼等還至雄州詔即以弼為接伴使有朝廷合先知者急置以聞弼奏曰彼求獻納二字

既以死拒之契丹氣折矣不可復許然朝廷竟從晏殊議許稱納字弼不預也

顧炎武日知錄曰宋史富弼傳言使契丹爭獻納二字聲色俱厲契丹主知不可奪乃曰吾當自遣人議之復使劉六符來朝廷竟以納字與之遼史劉六符傳則曰宋遣使增歲幣以易十六縣六符與耶律仁先使宋定進貢名宋難之六符曰本朝兵強將勇人人願從事于宋若恣其俘獲以飽所欲與進貢字孰

多宋乃從之歲幣稱貢二史並托克托監修而不同如此續資治通鑑長編曰慶歷二年八月乙丑契丹樞密副使保大節度使耶律仁先樞密使禮部侍郎同修國史劉六符入見其誓書云兩朝修睦二紀于此邊鄙用寧干戈載偃追懷先約炳若日月今綿襪已深敦好如故闔南縣邑本朝傳守俱難依從別納金帛之儀用代賦稅之物每年增絹一十萬足銀一十萬兩搬至雄州白溝交割兩界塘淀已前開



畝者並依舊例自今以後不得添展其堤堰水口逐  
時決洩壅塞量差兵夫取便修疊疏導非時霖潦別  
至大段漲暴並不在闕報之限南朝河北沿邊北朝  
自古北口以南沿邊兵民除見管數目依常教閱無  
別故不得大段添進兵馬如有別故添屯即令逐州  
軍移牒闕報兩界所屬之處其自來成例更替及本  
路移易不在闕報之限兩界逃走作過諸色人並依  
本朝誓書外更不得似日前停留容縱恭惟二聖威

靈在天傾茲纂承各當遵奉共循大體毋介小嫌且夫守約為信善隣為義二者缺一固以守國皇天厚地實聞此盟文藏宗廟副在有司餘並依景德統和兩朝誓書頒惟不德必敦大信苟有食言必如前誓陳振孫書錄解題曰奉使別錄一卷河南富弼彥國撰慶歷中使契丹歸為語錄以進機宜事節則見于此錄又一本有兩朝往來書附于末又云契丹講和記一卷不著名氏載契丹初講和本末末有慶

歷增幣後誓書 韋君安梅磧詩話曰或傳富鄭公  
奉使遼國遼使者云早登雞子之峰危如累卵荅曰  
夜宿丈人之館安若泰山又云酒如線因針乃見荅  
曰餅如月遇食則缺

冬十一月丁亥羣臣加上尊號曰聰文聖武英畧神功  
睿哲仁孝皇帝冊皇后蕭氏曰貞懿宣慈崇聖皇后

高麗史曰靖宗八年冬十一月契丹遣檢校禮部尚  
書王永言來詔曰朕以闕南十縣我國舊基將舉兵

師議復故壤宋朝累馳專介懇發重言定於舊貢銀  
絹三十萬兩外每年別納金縵之儀用代賦與之  
物再論盟約永卜歡和具諸道兵馬等優給蠲免賦  
調並已放還本部夫何眇躬成此美事今文武百辟  
屢拜封章加予以懿號鴻名不獲固辭勉依羣請已  
撰定十一月五日兩宮並行大禮卿稱藩事上望闕  
輸忠遐想聞知必增慶悅今遣使往諭

十二年春正月

書錄解題曰慶歷正旦國信使錄十卷余靖慶歷三年使遼所記 郭若虛圖畫見聞志曰皇帝與大遼國馳禮于今僅七十載繼好息民之美曠古未有慶歷中其主號興宗以五幅繡畫千角鹿圖為獻旁題年月日御畫上命張圖于太清樓下召近臣縱觀次日又勅中閤宣命婦觀之畢藏于天章閣 鶚按此興宗事不記年月因附見于此 高麗史世家曰靖宗九年冬十一月辛巳契丹遣冊封使蕭慎微使

副韓紹文都部署利川管内觀察留後劉日行押冊  
使殿中監馬至柔讀冊將作少監徐化治傳宣檢校  
左散騎常侍韓貽孫等一百三十三人來丁亥王設  
壇受命詔曰朕猥以眇德嗣受丕圖賴六聖之垂休  
致八方之咸服近從羣懇祇受鴻名凡在照臨畢均  
慶賞御世欽聲朔地襲土茅航深罄述職之儀事大  
竭為臣之節屬陳鉅禮載舉彝章特推進秩之恩併  
茂疇庸之數今遣使左監門衛上將軍蕭慎微使副

尚書禮部侍郎韓紹文持節脩禮冊命并賜車服冠  
劍印綬及國信等物具如別錄到可祇受冊文曰朕  
膺穹旻之寄紹祖宗之基四表歸仁偃靈旗而定霸  
百官攷禮鏤寶冊以加尊遐眷帝臣踐開國社航海  
之誠靡怠帶河之誓愈堅屬覃慶之在辰宜頌恩而  
及遠式遵徽典特舉寵章咨爾輸忠保義奉國功臣  
開府儀同三司守太保兼侍中上柱國高麗國王食  
邑七千戶食寔封一千戶王亨英哲間時仁慈績服

張皇土宇亘日域以分圻尊獎天朝仰宸居而送款  
戴舜樹弼成之業匡周規夾輔之勲化被蒼隅聲敷  
青岷朕昨戒嚴駕巡撫京畿邦戶展肆覲之儀都人  
契來蘇之望干戈不試獄市惟齊羣方則慕義向風  
交馳玉帛鄰國則畏威懷德增納金縑聿臻累洽之  
期適享虛名之冊是推皇澤首及王藩進絕席之崇  
資正專車之峻秩爰田益賦美號褒功是用遣使蕭  
慎微使副韓紹文持節備禮冊命汝為守太傅兼中



書令加食邑三千戶食寔封三百戶仍賜同德致理  
四字功臣散官勲爵如故於戲守君子國冠諸侯王  
論道而為周師奮庸而登漢相維堅臣節以答皇家  
享富貴于昌時傳功名于長世輝流竹素永維欽哉  
十三年夏四月

契丹國志曰夏四月朔日食 六月以將伐夏遣延  
昌宮使耶律高嘉努告宋 九朝編年脩要曰慶歷  
四年秋七月契丹來告伐元昊曰元昊負中國當誅

今將兵臨賊境或元昊乞稱臣幸無亟許其寔以納契丹降人討之託中國為名也復書略曰聞親搃師徒直臨賊境若以元昊於北朝失事大之禮則自宜問罪若以其於本朝稽効順之故則不煩出師況延州近奏元昊已遣楊宗素賫誓文入界若不依初約則猶可沮還如盡遵承則何以却之也乃命右正言余靖報使

冬十月辛亥元昊遣使來進方物詔北院樞密副使蕭

革逐之壬子軍于河曲草言元昊親率党項三部來詔  
草詰其納叛背盟元昊服罪賜酒許以自新遣之召羣  
臣議皆以大軍既集宜加討伐癸丑督數路兵掩襲殺  
數千人駙馬都尉蕭呼都克為夏人所執

九朝編年脩要曰宗真親將至夏國境上各據山巖  
兵相待曩霄奉危酒為壽大合樂折箭為誓及罷契  
丹夜以兵劫曩霄反為所敗曩霄縱其去

十四年春正月

續資治通鑑長編曰慶厯五年正月丙子契丹遣林牙彰聖軍節度使耶律宗睦來告討夏人回

春三月 夏六月

契丹國志曰春三月朔日食 夏六月有流星出營室南大如杯其光燭地隱然有聲

秋八月

續資治通鑑長編曰八月甲子監察御史包拯為契丹正旦使閣門通事舍人郭琮副之

本紀第二十

興宗三

十七年春正月二月 秋九月

契丹國志曰春正月朔日食 二月彗出虛晨見東

方指西南歷紫微垣至婁凡一百二十四日而滅

高麗史世家曰文宗元年春二月壬戌契丹遣忠順

軍節度使蕭慎微守殿中少監康化成等來祭靖宗

于虞宮王往參之秋九月壬午契丹遣福州管内觀

察使宗璘來冊王其冊曰眷乃馬韓之地素稱龍節  
之邦代襲王封品高人爵分頒金盞表榮觀於諸侯  
中錫彤旅得顯征于四履爰屬傑時之器允膺績服  
之權載歷臧時式均徽典權知高麗國王事王徽應  
基運之數鍾英異之靈天麟迺首於龜龍通明嘉瑞  
日觀遍崇于嵩華夙煥函經負文武之全才識忠孝  
之大本粵自勝衣有始構室推良靜守貞純動循禮  
樂慕桓文之霸業精衛霍之兵符富厥令圖稔茲淑

會洎帥臣之告闕亟藩國之歸尊而能惠一方情協  
羣望及露章而斯登故寵數以難稽是用宜顯被於  
紫綸俾特建於元社倚為左相峻秩三師超躋馭貴  
之階優賜褒功之號盈疏實賦劇轉清勲於戲周天  
王之重非熊止遙分於齊壤漢高祖之刑白馬仍納  
約於劉宗順考古先罕偕思禮用卜悠長之祚愈堅  
匡合之誠勉佩訓言仰迪神祐可特授開府儀同三  
司守太保兼侍中上柱國封高麗國王食邑七千戶

食寔封一千戶無賜匡時致理竭節功臣之號

十八年春正月

東國通鑑曰文宗仁孝王二年春正月契丹遣千牛衛上將軍蕭維德御史大夫王守道來冊王為守太傅兼中書令高麗國王加食邑三千戶食寔封三百戶仍賜資忠奉上四字功臣階勲如故并賜車服冠劍印綬及衣帶匹段等物王受冊於南郊

十九年春二月



續資治通鑑長編曰皇祐二年春二月庚子契丹遣  
殿前副點檢中正節度使耶律益彰德節度使趙東  
之來告伐夏國還益自言契丹三路進討契丹主出  
中路兵至西京府獲羊百萬橐駝二十萬牛五百俘  
老幼甚衆惟南路小失利恐夏人妄說軍勝誇南朝  
然得邊奏皆以謂契丹主濟河不遇賊無水草馬多  
死耶律貫寧大敗于師子口惟劉五常獲陝西所陷  
屬戶羗二十餘人因而來獻其言多俘獲蓋妄也已

西翰林學士刑部郎中知制誥趙槩為回謝契丹國  
信使西上閤門使貴州團練使錢晦副之 東都事  
畧曰趙槩字叔平應天府虞城人也入翰林為學士  
皇祐二年館伴契丹汎使遂報聘焉契丹請賦信誓  
如山河詩詩成契丹主親酌玉杯以勸且以素扇授  
其近臣劉六符寫槩詩置之懷袖

二十年秋八月

續資治通鑑長編曰皇祐三年秋八月乙未翰林學

士刑部郎中知制誥兼侍講史館修撰曾公亮為契丹國母生辰使至鞞淀契丹使劉六符來伴宴且言耶律防善畫向持禮南朝寓聖容歸欲持至館中王洙曰此非瞻拜之地也六符言恐未得其真欲遣防再往傳繪洙力拒之

二十一年夏四月

續資治通鑑長編曰皇祐四年夏四月丙戌契丹國母遣順義節度使右監門衛上將軍蕭昌右諫議大

夫劉嗣復契丹主遣彰國節度使蕭昱益州防禦使  
劉士方來賀乾元節其國書始去國號而稱南北朝  
且言書稱大宋大契丹非兄弟之義帝召二府議之  
參知政事梁適曰宋之為宋受之于天不可改契丹  
亦其國名自古豈有無名之國又下兩制臺諫官議  
皆以講和以來國書有定式不可輒許乃詔學士院  
答書仍稱大宋大契丹其後契丹復有書亦稱契丹  
如故王睎道山清話曰契丹遣使論國書中所稱

大宋大契丹似非兄弟之國今宜易曰南北朝上詔  
中書密院共議時輔臣多言此不計利害不從徒生  
怨隙梁莊肅曰此易屈耳但答言宋蓋本朝受命之  
土契丹亦彼國號無故而自去非策其年賀正使復  
稱大契丹如故

二十二年夏四月

契丹國志曰夏四月朔日食

二十三年秋九月

續資治通鑑長編曰至和元年秋九月乙亥契丹遣忠正節度使同平章事蕭德翰翰林學士左諫議大夫知制誥史館修撰吳湛來告與夏國平且言通好五十年契丹主思南朝皇帝無由一會見嘗遣耶律防來使竊畫聖容曾未得其真故交馳畫像庶瞻覲之以紓兄弟之情或者慮契丹得御容敢行咒詛趙抃言其不然卒許之辛巳三司使吏部侍郎王拱宸為回謝契丹使德州刺史李珣副之拱宸見契丹主于

混同江契丹每歲春漲于水上置宴釣魚惟貴族近  
臣得與每得魚必親酌勸拱宸又親鼓琵琶侑之謂  
其相劉六符曰南朝少年狀元入翰林十五年矣吾  
故厚待之

冬十一月

東都事略曰吳奎遷知制誥使契丹遇契丹主加稱  
尊號邀使者入賀奎自以使事有職不為往比還中  
道與契丹衣服以金冠為重紗冠次之而使入輒欲

以紗冠遯漢使盛服奎不許而殺其禮見之坐是黜  
知壽州

二十四年

周輝清波雜誌曰至和二年劉原父敝使契丹檀州  
守李翰勞其行役對云跋涉不辭但山路迂曲自過  
長興却西北行六程到柳河方稍南行意甚不快又  
云聞有直路自松亭關往中京纔十餘日程自柳河  
纔二百餘里翰笑曰盡如所示乃初踏逐修館舍已



定至今迂曲

八月己丑帝崩于行宮年四十遺詔燕趙國王洪基嗣位清寧元年十月庚子上尊謚為神聖章孝皇帝廟號興宗

契丹國志曰八月國主崩先是日食正陽客星出于昴宋著作佐郎劉義叟曰遼主其死乎至是果驗

續資治通鑑長編曰至和二年八月己酉契丹主宗真卒年四十一謚文成皇帝廟號興宗宗真性佻嘗

與教坊使王稅輕等數十人約為兄弟出入其家至  
拜其父母數變服入酒肆佛寺道觀王綱姚景熙馮  
立輩遇之于微行後皆任顯官尤重浮圖法僧有正  
拜三公三師兼政事令者凡二十人馬保忠嘗勸以  
臣下無勲勞宜且序進之怫然怒曰若爾是君不得  
專豈社稷之福耶保忠恐自是欲有遷除必先厚賜  
貴臣以絕其言故親信者哈喇王等數十人皆拔處  
將相嘗夜燕與劉四端兄弟王綱入樂命君妃易衣

為女道士后父蕭瑪展曰漢官皆在后妃入戲恐非  
所宜宗真毆瑪展敗面曰我尚為之若女何人耶宗  
真善畫鹿嘗以所畫鵝雁來獻上作飛白書答之



遼史拾遺卷九